

Oleh : DATUK SERI SYED HAMID ALBAR
Tempat : KOTA BAHRU, KELANTAN
Tarikh : 18 APRIL 2003
Tajuk : UCAPTAMA SEMPENA FORUM HAK ASASI MANUSIA
MENURUT PERSPEKTIF ISLAM: HAK UNTUK PERPADUAN UMMAH

Yang dihormati Pengerusi Majlis,

Y.Bhg. Datuk Mustapha Mohamad
Ketua Badan Perhubungan UMNO Kelantan,

Y.Bhg. Dato' Kamilia Dato' Ibrahim,
Pengerusi, Majlis Perunding Wanita
Islam Malaysia (YADIM),

Y.Bhg. Dato'-Dato', Tuan/Puan,

Saudara/Saudari,

Assalamualaikum dan Selamat Pagi,

Saya bersyukur kepada Allah SWT kerana di atas limpah kurnia dan izinNya, maka dapatlah saya berada di Kota Bahru pada hari ini untuk bersama-sama Saudara/Saudari di Forum Hak Asasi Manusia Menurut Perspektif Islam: Hak Untuk Perpaduan Ummah, anjuran bersama YADIM dan Badan Perhubungan UMNO Kelantan. Saya ucapkan tahniah dan syabas kepada kedua-dua Badan yang bertanggungjawab menganjur Forum ini dan terima kasih di atas jemputan untuk saya berucap dan merasmikan Forum ini.

2. Saya percaya, semua peserta dan hadirin akan mendapat faedah dan manfaat daripada Forum ini. Forum seperti ini, selain daripada membolehkan pertukaran pandangan tentang tajuk Forum dan isu-isu semasa lain, juga boleh membina kefahaman dan idea-idea bernas untuk kita sama-sama berkongsi supaya hasrat dan matlamat kita untuk mewujudkan perpaduan ummah dapat dicapai dengan berkesan.

Saudara/Saudari,

3. Kita perlu menerima hakikat bahawa keperluan untuk menangani Perpaduan Ummah adalah suatu yang amat penting. Malahan dari segi agama, ianya juga dituntut supaya perpecahan di kalangan Ummah dapat dibendung atau dihapuskan. Suasana persaudaraan dan perpaduan yang akrab antara kita, tidak kira dari mana asal dan keturunan atau warna kulit akan dapat menyumbang kepada matlamat mencapai perdamaian yang membolehkan segala usaha baik dalam pelbagai bidang dilaksanakan dengan sempurna. Sebaliknya, dalam keadaan perpecahan, kacau bilau, curiga-mencurigai, permusuhan, dengki-mendengki dan peperangan tentu

sekali kita tidak akan dapat mencapai kesejahteraan Ummah. Ini jelas terbukti dengan peristiwa-peristiwa lalu yang telah berlaku dan juga yang sedang kita lihat dan alami pada hari ini. Persengketaan dan perbalahan akan terus wujud apabila tidak ada tindakan yang sewajarnya diambil untuk menangani permasalahan yang timbul.

4. Usaha-usaha untuk mencapai perpaduan dan kedamaian bukanlah soal perkara yang mudah dan senang untuk dilaksanakan. Tetapi, kita sebagai makhluk yang diberi tanggungjawab oleh Allah SWT untuk mentadbir dunia, haruslah berusaha ke arah mencapai matlamat itu biarpun ianya sukar dan terpaksa menghadapi berbagai halangan dan rintangan. Dalam konteks inilah, kita mesti menyelami maksud hak asasi manusia yang sebenarnya dari sudut perpaduan Ummah supaya kita dapat mempertahankan hak kita sebagai orang Islam untuk maju berlandaskan kepada Al-Quran dan Sunnah Nabi. Ini adalah hak kita yang kita mesti perjuangkan sejajar tuntutan agama Islam demi menjamin kepentingan dan keutuhan Ummah di masa depan.

5. Untuk mencapai matlamat ini, orang Islam haruslah mengakui bahawa kita semua tergolong didalam kelompok kalangan manusia yang mempunyai hak untuk dihormati, hak untuk kebebasan dan dilindungi daripada kekejaman manusia yang tidak bertanggungjawab. Ini adalah antara beberapa elemen sebagai contoh yang mesti dipertahankan. Sikap toleransi yang sebenar-benarnya juga penting agar keperluan manusia untuk mendapat dan mempertahankan hak masing-masing supaya tidak ada diskriminasi samada dari segi kaum, darjat rupabangsa atau jantina.

Saudara/Saudari,

6. Sebagaimana kita semua mengetahui, dunia kini telah memasuki abad Ke-21 yang penuh dengan ciptaan manusia yang canggih dan moden bagi memudahkan kita semua menjalani hidupan harian dengan lebih sempurna. Malangnya, apa yang telah berlaku dan apa yang kita saksikan, dunia masa kini masih dilanda kemelut dan konflik yang amat hebat yang tidak sahaja menganjak pola pemikiran kita tetapi juga menimbulkan banyak ketidaktentuan. Ini mengakibatkan timbul persoalan kemanakah arah sebenarnya dunia ini akan menuju. Adakah kita akan terus berhadapan dengan peperangan, konflik antarabangsa, rantau dan dalam negeri, penganiayaan serta penindasan yang akan terus mengugat keamanan dunia sejagat? Atau adakah kita akan dapat menikmati keamanan dan kestabilan yang benar-benar dapat memberi kita ruang untuk menjaga hak kita?

7. Walau apapun situasi yang kita hadapi, apa yang penting, kesepakatan perlu ada di kalangan Ummah untuk menghadapi segala cabaran dan kemungkinan. Dengan kesepakatan yang utuh, kita dapat menghalang dari berlakunya perkara-perkara yang tidak diinginkan. Apa yang terjadi, di Iraq, akibat pencerobohan Amerika Syarikat dan sekutunya, menzahirkan kepada dunia betapa rapuhnya perpaduan di kalangan Ummah. Oleh kerana, tidak ada kesepakatan, Iraq dapat diceroboh, dan secara langsung, pemimpin dan rakyat Iraq hilang hak ke atas negara mereka. Pencerobohan yang dilakukan oleh Amerika Syarikat dan sekutunya ke atas Iraq

adalah suatu tindakan yang tidak dapat diterima akal yang waras kerana pencerobohan telah dilakukan tanpa mengambilkira kedaulatan dan hak negara maupun hak kemanusiaan mereka. Bagi Amerika Syarikat dan sekutunya, semua itu tiada nilai kepada mereka. Yang pentingnya, hasrat dan objektif mereka dapat dicapai meskipun pembbohongan perlu dilakukan bagi menyakinkan masyarakat antarabangsa bahawa regim Saddam Hussein mesti dihapuskan kerana mengancam Amerika Syarikat dan kestabilan dunia.

8. Sekarang dunia benar-benar mengetahui niat sebenar Amerika Syarikat. Tetapi semuanya telah terlambat. Iraq, sebuah negara yang mempunyai tamadun yang tinggi sejak beribu tahun telah hancur musnah. Iraq sebenarnya telah menjadi mangsa akibat dasar dan tekanan kuasa besar dunia serta sekutunya yang hanya mendatangkan kesusahan kepada rakyat Iraq yang tidak berdosa. Kini Negara penceroboh dengan kunci-kuncunya pula sedang sibuk mengambil langkah untuk mentadbir dan membangunkan semula Iraq. Tetapi bagi rakyat Iraq, mereka berhadapan dengan persoalan yang besar kerana tidak ada kepastian samada hidup mereka di bawah pemerintah sementara Amerika Syarikat dan sekutunya ataupun di bawah Kerajaan Iraq yang baru akan lebih baik.

9. Oleh kerana itulah, Malaysia dari awal lagi telah menolak dan menentang dengan keras tindakan ketenteraan terhadap Iraq kerana pendekatan yang diambil itu bukanlah cara penyelesaiannya. Suara bantahan kita ini, dikongsi oleh sebilangan besar masyarakat dunia yang tidak mahukan pencerobohan dan peperangan. Tetapi, semuanya ini tidak dipedulikan. Dan akibatnya, Iraq telah hancur musnah dan pendekatan 'unilateralisme' dan hegemonistik, bakal wujud sebagai teras kepada 'orde baru dunia'. Kita perlu berhadapan dengan ini dan menanganinya dengan sebaik mungkin agar hak kebebasan kita dan juga negara kita yang berdaulat tidak akan terancam.

10. Kita perlu sedar bahawa Negara dan masyarakat Islam sentiasa tertekan dan menghadapi ancaman serangan, tindakan prejudis dan intimidasi. Kenyataan Presiden Amerika Syarikat yang menuduh Syria mempunyai senjata pemusnah dan senjata kimia serta memberi perlindungan kepada Saddam Hussein menggambarkan keadaan ini. Syria diberi amaran akan diserang sekiranya tidak bekerjasama dengan Amerika Syarikat untuk menghapuskan senjata pemusnah dan kimia yang dikatakan dimiliki oleh Syria. Tindakan sedemikian tentunya akan mendatangkan kemarahan kepada negara-negara Islam kerana tuduhan berkenaan tidak berasas. Dalam keadaan ini, apa yang jelasnya, Amerika Syarikat sememangnya mempunyai niat lain yang jahat. Tindakan Amerika Syarikat yang penuh dengan ego itu beserta sikap berat sebelah yang diamalkannya akan membawa padah kepada Syria dan negara-negara lain jika tidak ditangani dengan betul. Usaha-usaha murni untuk mencapai keamanan di Asia Barat berkemungkinan besar juga akan turut terbantut dan hancur.

Saudara/Saudari,

11. Dalam keadaan persekitaran dunia yang tidak menentu kini, perpaduan ummah merupakan suatu perkara yang terpenting di dalam menjaga keselamatan negara. Negara yang mempunyai berbilang bangsa memerlukan formula dan cara untuk memastikan keharmonian sentiasa terpelihara. Masyarakat kita dan dunia tanpa mengira batas dan sempadan negara, usia, agama dan bangsa amat memerlukan kehidupan yang harmoni demi mencapai kesejahteraan sejagat. Tegasnya Perpaduan adalah lambang kepada kekuatan. Pada zaman kegemilangan Islam, amat jelas kejayaan Islam dan perpaduan yang didukung menjadikan kehebatan Islam melepasi benua Afrika dan Eropah. Malah syiar Islam berkembang sehingga satu pertiga dunia dalam tempoh yang singkat.

12. Hari ini anasir-anasir yang menggugat kestabilan negara tetap ada dan terus berusaha untuk memusnahkan kedamaian, memusnahkan ekonomi dan meranapkan segala nikmat dan kemajuan yang ada. Apakah kita patut berdiam diri dan berpeluk tubuh? Jawabnya tentu tidak. Kita mesti melawan anasir-anasir ini. Cara terbaik ialah kita mesti bersatu padu kerana ini akan menjadikan kita kuat.

13. Sebagai orang Islam, ini juga merupakan tanggungjawab kita. Allah berfirman dalam Surah Ali Imran ayat 103, yang bermaksud "Sesungguhnya orang mukmin itu adalah bersaudara. Hendaklah kamu sekalian berpegang dengan tali Allah dan janganlah berpecah belah; dan ingatlah nikmat Allah kepada kamu sekalian; ketika kamu bermusuhan, lalu Allah jinakkan antara hati-hati kamu; maka dengan nikmatnya kamu jadi bersaudara".

14. Islam adalah agama yang cintakan keamanan, agama yang menekan perpaduan dan penyatuan ummah. Perpaduan akan dicapai melalui proses integrasi dan asimilasi dalam negara yang boleh membentuk sebuah masyarakat yang bersatu. Al-Quran banyak membicarakan berhubung dengan susunan masyarakat. Berulang kali dinyatakan bahawa manusia adalah dijadikan dalam pelbagai warna kulit dan bangsa. Walaupun Allah SWT dengan ketinggian kuasa yang dimilikinya boleh memilih untuk menjadikan manusia itu dari satu umat sahaja seperti yang dinyatakan oleh Surah al-Maidah: ayat 48 bermaksud; "Dan sekiranya Allah mahu, nescaya Dia menjadikan kamu satu umat (yang bersatu dalam agama)".

15. Namun sebaliknya, Allah SWT memilih untuk menjadikan manusia itu dari pelbagai jantina, bangsa dan puak sepertimana firmannya dalam Surah al-Hujarat: ayat 13 bermaksud: "Wahai manusia, sesungguhnya kami ciptakan kamu daripada lelaki dan perempuan, dan kami jadikan kamu berbangsa-bangsa dan berpuak-puak supaya kamu berkenalan dengan baik. Sesungguhnya yang paling mulia di sisi Allah ialah yang paling takwa daripada kalangan kamu".

16. Masyarakat Islam wajar menghayati ingatan dari Al-Quran ini dan menerima hakikat bahawa tidak mungkin berlaku suasana bahawa dunia amnya dan Negara ini khususnya akan hanya dihuni oleh satu bangsa, kaum dan agama. Tambahan pada hari ini, arus globalisasi menjadikan dunia semakin mudah dijelajahi oleh manusia.

Sejajar dengan tuntutan ajaran Al-Quran adalah wajib diadakan suasana dimana setiap bangsa, kaum dan agama dapat saling berkenalan dan hidup bersama-sama dengan harmoni. Tegasnya, Islam itu tidak bersikap menentang atau memusuhi kaum dan bangsa lain meskipun berbeza agama. Sebaliknya, Islam menerima mereka dan memberi pengiktirafan kepada perbezaan kepercayaan yang dianuti oleh masyarakat berkenaan dengan memberikan hak mereka yang sewajarnya.

Saudara/Saudari,

17. Dalam mengatur program untuk menjamin kesejahteraan sejagat, pendekatan yang dianjurkan oleh Islam amat sesuai. Perbezaan agama, budaya, bangsa dan fahaman boleh diatasi jika semua pihak bersedia untuk saling mempelajari mengenai orang lain dan tidak bersikap memaksa supaya orang lain menerima apa yang kita fikirkan sebagai betul dan sesuai. Ajaran dan prinsip inilah yang dipegang oleh Malaysia sehingga menjadi contoh kepada negara Islam lain pada hari ini dari aspek pemeliharaan hak antara kaum, perpaduan dan mempelopori kesejahteraan sejagat.

18. Kita di Malaysia perlu sentiasa bersyukur kepada Allah SWT kerana terus dapat menikmati kehidupan di dalam suasana aman yang membenarkan kita memainkan peranan masing-masing untuk kesejahteraan hidup kita di dunia dan InsyaAllah di akhirat juga. Namun begitu, kita mesti ingat yang kita masih tetap menghadapi kesan-kesan samada secara terus atau tidak, yang menyebabkan kita merasa bahawa keamanan dan kestabilan yang dinikmati tidak seratus peratus terjamin. Ini kerana kita tidak dapat lari daripada situasi dan perkembangan disekeliling kita atau dari tempat yang jauh akibat pergolakan politik dan turun naik ekonomi dunia. Kita juga tidak dapat mengelak daripada kesan saling pergantungan (inter-dependence) di antara kita dan masyarakat di dunia luar, samada dari segi politik, ekonomi dan keselamatan antarabangsa.

Saudara/Saudari,

19. Hak manusia menikmati kesejahteraan sejagat dan hidup dalam suasana harmoni tanpa mengira agama, bangsa, usia dan sempadan negara adalah matlamat yang telah diperjuangkan sejak berzaman dalam tamadun manusia. Pelbagai formula telah dirangka untuk mencapai matlamat tersebut. Bagi Malaysia, Kerajaan juga mempunyai agenda yang ditetapkan untuk mencapai matlamat ini dan memastikan keamanan dikekalkan di negara ini. Alhamdulillah, setakat ini kita telah berjaya dan kita perlu bangga kerana keamanan yang dikecapi di Malaysia bukanlah atas dasar paksaan dan penindasan. Ianya dicapai dengan dasar penyatupaduan kaum berbagai bangsa dan agama sepertimana yang dijamin oleh Perlembagaan Persekutuan. Setiap bangsa mendapat hak mereka. Pemerintahan Negara berlangsung menurut prinsip demokrasi yang sesuai dengan suasana persekitaran Negara ini, begitu juga dengan pentadbiran undang-undangnya. Malaysia sentiasa menjadikan prinsip-prinsip undang-undang antarabangsa sebagai rujukan dalam menggubal undang-undang, dan dalam masa yang sama tidak mengeneipkan prinsip undang-undang Islam dan tempatan.

20. Apa yang penting pada ketika ini ialah perlunya masyarakat dunia berusaha memperkukuhkan semula konsep dan proses pelbagai hala atau 'multilateralisme' yang merupakan satu-satunya pendekatan yang boleh menjamin dan memelihara prinsip-prinsip asas demokrasi di dalam hubungan antarabangsa. Pada masa yang sama, masyarakat dunia perlu terus komited kepada peranan utama Pertubuhan Bangsa-Bangsa Bersatu dan Piagamnya.

21. Bagi Malaysia, kita akan terus mengambil usaha-usaha yang bersesuaian sebagai sumbangan kita di dalam usaha-usaha ke arah keamanan dan perpaduan dunia. Malaysia, sebagaimana Saudara/Saudari sedia maklumi telah menganjur Sidang Kemuncak Ke-13 Pergerakan Negara-Negara Berkecuali (NAM) di Kuala Lumpur pada 24 – 25 Februari lalu. Sekaligus, Malaysia juga menjadi Pengerusi Pergerakan tersebut untuk tempoh tiga tahun. Dengan adanya platform ini dan berpedukan kepada pelan-pelan tindakan yang dipersetujui oleh negara-negara NAM ke arah mencapai kestabilan dan keamanan dunia, kita harap masyarakat antarabangsa akan dapat melaksanakan tanggungjawab bagi memastikan hak keamanan sejagat dan perpaduan dipelihara untuk dimanfaatkan oleh masyarakat sejagat.

22. Malaysia juga akan menganjurkan Sidang Kemuncak Pertubuhan Persidangan Islam (OIC) pada bulan Oktober nanti dan akan menjadi Pengerusi OIC untuk tempoh dua tahun. Ini sekali lagi memberi peluang kepada Malaysia dengan kerjasama negara-negara OIC untuk menggubal agenda dan pelan tindakan bagi menjaga dan meningkatkan kepentingan bersama di samping menyumbang kepada usaha untuk mewujudkan keamanan dunia.

23. Saya harap dalam waktu kita menjadi Pengerusi kepada kedua-dua Pertubuhan ini, Malaysia akan dapat mengembeling tenaga dan usaha dengan negara-negara anggota bagi menerajui langkah-langkah menangani cabaran global masakini. Untuk mencapai objektif ini, sokongan berterusan daripada berbagai-bagai pihak di Malaysia, amatlah penting. Ini adalah kerana perjuangan yang akan kita dokong ini tidak hanya terhad kepada kerajaan. Ia harus melibatkan segenap lapisan masyarakat.

24. Akhirkata, saya berharap penjelasan ringkas saya dapat dimanfaatkan oleh semua hadirin. Saya dengan sukacitanya, dengan, lafaz Bismillah Hirrahmanir Rahim, merasmikan Forum Hak Asasi Manusia Menurut Persepektif Islam bertemakan "Hak Untuk Perpaduan Ummah" dan mengucapkan Selamat Maju Jaya kepada semua.

Wassalamu'alaikum Warrahmatullah hi Wabarakatuh.